



Ignazi Caduff-Casanova

Il Nazi ei naschius a Rueras ils siat da settember 1919. Ses geniturs ein stai Rest Antoni Caduff ed Onna Maria Hendry da Cavorgia. Quella famiglia ha giu treis feglias e dus fegls. Il bab ei morts baul, cun 47 onns igl onn 1921, laschond anavos 5 miez orfans. Grazia alla beinvulientscha da dus augs ledigs ei la mumma semessa el tener casa cun quels. Havend in pulit fatg puril han els saviu ver la ventira da guder quei ambient.

La scola ha il Nazi frequentau enta Rueras, lu ius la reala a Camischolas e 1933/34 in onn gimnasi a Mustér en claustura. 1952 fa el enconuschientscha cun la giuvna Anastasia Casanova, oriunda da Vrîn e sespusa cun quella. Da quella letg derivan treis feglias e sis fegls. Secapescha che aschia ina famiglia ha duvrau quitau e lavur per vegnir atras. L'entschatta han els fatg il pur, mo pli tard ei il Nazi sengaschus e luvrau tier la societad electrica a Sedrun. Legria e quitaus han dau in l'auter il maun. Sacrificis e cruschs han buca muncau, grevas cruschs. Mo jeu creiel ch'il Nazi hagi savens purtau grev en siu intern. Probabel ha gest quei purtar tschelau, favorisau il malesser da sia sanadad. Sa tgei patratgs nus fagessen sche nus savessen beinduras leger egl intern d'in carstgaun mudergiaus da cruschs e greveziass?

Ils davos onns han sgurdinau malamein sia sanadad. Il davos viadi ei staus que el spital a Glion nua ch'el ei spartius ils 28 da zercladur e surdau sia olma e scaffider. Adumbatten tscherchein nus el vinavon co el vegneva la dumengi endamaun giu da Las Sorts per ira en baselgia. Baul in, baul l'auter che svanesche Lein buca emblidar els. Han gie tuts fatg part d'in ton da nies viadi terrester, en sch'igl ei stau mo muments.

Al Nazi vegli Niessegner dar la pagaglia per tuts ses buordis supportai ed el possu ruassar en pasch.